

KOBLENZ

Koblenzer Mundart von Katharina Schaaf:

Dä Modewechsel!

Kenner, wie die Mode wechselt,
dat hat noch kein Mensch erlebt.
Wat die sich zesamme drechselt,
heut su manche Mann betreeft.

Net nur weil dat Minikleidche
jetzt dem Männerblick entrinnt -
dat begehrte Aueweidche,
aus dem Stroßebild verschwind'.

Nä, et gieht och om die „Scheincher“,
die dä Modewechsel schluckt;
net nur om dä Sex on Beincher,
wo die Männerwelt noh guckt.

Körzer mache kann mer emmer,
wenn et sein moß, bis zom Hals.
Länger mache es vill schlemmer,
do moß Neu her, jedenfalls.

Och, wat es dat e Gebammel
met der Maxi-, Midiröck.
Widder wierd modern dä „Hammel“,
fein garniert met Stroßedreck.

Jo, Frau Mode kennt kein Gnade -
heut gekörzt, morje gestreckt.
Freid han jetzt die „Knubbelwade“,
denn se were scheen verdeckt.

Kath. Schaaf 5.9.70